

Պողոսյանն ու Բաղդասարյանն ընդդեմ Հայաստանի
(գանգատ թիվ 22999/06)
Երրորդ բաժանմունքի 2012 թվականի հունիսի 12-ի վճիռ

Կոնվենցիայի թիվ 7 արձանագրության 3-րդ հոդված

Փոխհատուցում

Արդարադատության սխալի հետևանքով տուժողի անկարողությունը՝ ոչ նյութական վնասի համար փոխհատուցում պահանջել: *Արձանագրվել է խախտում:*

Կոնվենցիայի 13-րդ հոդված

Պաշտպանության արդյունավետ միջոց

Ոստիկանության դաժան վերաբերմունքի արդյունքում կրած ոչ նյութական վնասի փոխհատուցում ստանալու հնարավորության բացակայություն: *Արձանագրվել է խախտում:*

Փաստերը

1999 թվականին առաջին դիմումատուն մեղավոր է ճանաչվել սպանության և բռնաբարության կատարման մեջ և դատապարտվել 15 տարվա ազատազրկման: Այնուամենայնիվ, նա շարունակել է պայքարել իր անմեղության համար, և 2004 թվականին նրա նկատմամբ կայացված դատավճիռն ուժը կորցրած է ճանաչվել և նա ազատ է արձակվել: Սպանության գործի նախաքննությունը կատարած ոստիկանության երկու աշխատակիցների նկատմամբ իրենց լիազորությունները գերազանցելու հիմքով քրեական գործ է հարուցվել այն բանից հետո, երբ առաջին ատյանի դատարանը արձանագրել է, որ նրանք դաժան վերաբերմունք են ցուցաբերել առաջին դիմումատուի նկատմամբ՝ նրանից խոստովանական ցուցմունքներ կորզելու նպատակով: Առանձին իրականացվող քաղաքացիական վարույթի ընթացքում առաջին դիմումատուն կորցրած եկամուտների մասով փոխհատուցում է ստացել, բայց ոչ նյութական վնասի հատուցման վերաբերյալ նրա հայցը մերժվել է այն հիմքով, որ քաղաքացիական օրենսգիրքը նման տեսակի վնաս չէր նախատեսում:

Իրավունքը՝ Կոնվենցիայի 13-րդ հոդված

Դատարանը սկզբում մատնանշել է, որ Կոնվենցիայի մեկ այլ հոդվածի խախտման առկայությունը չի կարող նախապայման հանդիսանալ 13-րդ հոդվածի կիրառման համար: 13-րդ հոդվածի կիրառման համար բավարար է, որ անձն ունենա Կոնվենցիայի իմաստով հիմնավոր պահանջ: Դատարանն արձանագրել է, որ դիմումատուն անկասկած ունեցել է ներպետական դատարաններում հիմնավոր պահանջ՝ Կոնվենցիայի 3-րդ հոդվածով արգելված վերաբերմունքի ենթարկվելու համար: Հետևաբար, Կոնվենցիայի 13-րդ հոդվածը կիրառելի է, թեև Եվրոպական դատարանը նշել է, որ ինքը չի կարող ըստ էության քննել 3-րդ հոդվածի նյութական խախտման փաստը, քանի որ նշված դեպքերը տեղի են ունեցել ՀՀ կողմից Կոնվենցիան վավերացնելուց առաջ: Դատարանն նշել է նաև, որ ինքը բազմաթիվ գործերով արձանագրել է, որ Կոնվենցիայի ամենահիմնարար դրույթների՝ 2-րդ և 3-րդ հոդվածների խախտման դեպքում ոչ նյութական վնասի համար փոխհատուցում ստանալու հնարավորությունը պետք է նախատեսված լինի պաշտպանության հնարավոր միջոցների շարքում: Քանի որ ներպետական օրենսդրության համաձայն՝ որևէ փոխհատուցում հասանելի չի եղել առաջին դիմումատուին, ուստի նա զրկված է եղել արդյունավետ պաշտպանության միջոցից:

Եզրակացություն: Արձանագրվել է խախտում (միաձայն):

Կոնվենցիայի թիվ 7 Արձանագրության 3-րդ հոդված

Քանի որ դիմումատուի դատավճիռը բեկանվել է, և նա փոխհատուցում ստանալու համար դիմել է թիվ 7 Արձանագրության՝ ՀՀ-ի համար ուժի մեջ մտնելուց հետո, Եվրոպական դատարանը հավաստել է իր ժամանակային *[ratione temporis]* իրավագործությունը այս գանգատի նկատմամբ: Դատարանն արձանագրել է, որ թեև այդ դրույթը երաշխավորում է փոխհատուցման տրամադրումը համապատասխան երկրի օրենսդրությանը կամ պրակտիկային համապատասխան, դա չի նշանակում, որ փոխհատուցում չի վճարվում, եթե ներպետական օրենսդրությունը կամ պրակտիկան

չեն սահմանում նման փոխհատուցման վերաբերյալ դրույթներ: Բացի այդ, Եվրոպական դատարանը գտել է, որ թիվ 7 Արձանագրության 3-րդ հոդվածի նպատակը ոչ միայն սխալ դատապարտման դեպքում նյութական վնասի վերականգնումն է, այլ նաև դատական սխալի հետևանքով դատապարտված անձին փոխհատուցման տրամադրումն է ցանկացած ոչ նյութական վնասի, օրինակ՝ տագնապի, անհանգստության, անհարմարության և կյանքի նկատմամբ հետաքրքրության կորստի համար: Նման փոխհատուցում դիմումատուին տվյալ գործով, այնուամենայնիվ, չի տրվել:

Եզրակացություն: Արձանագրվել է խախտում (միաձայն):